

Gränzgänger



Fasnacht 2017

D` Noochfroog zem „Basel by Sight“- Bus ...
isch schytter !



Mit de *Gränzgänger* - Chaise sehsch meh
... und vyl wyter !!

Die Turischte-Bus z`Basel hänn kuum je vyl Lyt,
dasch logisch, mit däne gsehsch jo fascht nyt !
Kasch lang e scheene Kulturbsuech plane –
dä Bus darf jo an vyl Ort nit aane !
Zuedäm hän alli Turischte-Bus
ebbis gmainsam: druff warte muesch duss !
Kunnsch denn zrugge - nimmsch d`Hand vom Griff,
stohsch wider ohni Dach voruss im Schiff !
Do nimmsch lieber en offeni Gränzgänger-Chaise,
denn hesch wenigstens ebbis fir Dyni Speese,
und kunnsch - trotz Wessels` Verkehrskonzept –
zue turistische Ort, wo d`Kultur-Stadt no pept !
Allerdings wisse au d`Binggis scho Bscheid,
wievyl Laid dr Basler Verkehr nit vertrait !
Si wänn dorum d`Zuefahrt zem Münschter schnäll rette:
Jetz lueg emool gnau uf die goldig Blaggede !

Basel Statt-Marketing organisiert fir Turischte :

Chaise – Trips

zue ganz bsundere „So tickt Basel“-Hailaits !

Trip 1 : Kultur-Tsentrum Kasärne

Besichtigungsprogramm:

1. **Querulante- Museum** im Velokäller.
(Praktischi Obstruktions-lebige:
Heidi Lachenmeier - Mätteli).
2. **Schattewurf-Kabinett** uf em Zinne-Dach .
(Fiehriige all Stund in 6 Sprooche: Anita Mück)
3. **Erik`s Tattoo-Studio**, macht gstoche scharfi ...
Schottemotiv! (Bewilligung gilt nit fir Kilt!)

Notabene: Gib uf em Haimwäg acht uf d` Warntafele:
< **Heb dr Sorg im Glaibasel !!** >

Trip 2 : Halali im Quartier

Luchsjagd im Margrethe-Park und uf dr Kunschti.
Alli Frytig vo Mitternacht bis fiat Luchs!

Bellobene: Nimmsch Dyne an d` Leine im Gundeli:
Lueg gnau, e Luchs isch kai Hundeli !

Trip 3 : Tournée Sous Vide (isch franzeesisch)

Kessler-Zmorge im **Ackermann-Hof** (Residänz Stadtpreesi)
Rundgang dur die leere **Versprächigs-Zimmer** und Meditation
vor em **Moringue-Visionsvakuum**, Halt bim waggliche
Stadtentwickel-Tisch und em duschtere **Verwaltungs-Labyrinth**.
Yblig ins stedttschi **Effiziänz-Labor** mit dr grossreeltige
Sammlig vo Renitenz-, Resistenz-, Divergenz-,
Insolvenz-, Demenz- Ignoranz-, und Arroganz-Fläsche,
und verbruuchte farblose Kompetenz-Kanüle (Hohnoodle)

Notabene: Nit in jedere leere Fläsche het`s au e Gaischt !

Guynesisch Geng Pfui: Isch Dy Nummere 2 Dir, Nummere 1, iberläge,
denn muesch Dynere 2 dr Ascht absäge !
Nimm aber kai Rücksicht uf Aastand und Stil !
Denn glingt Dir s`politisch Schwarzpeter-Spiil !
(Th.Kessler: Leitfaden für Stadtpräsidenten 2017)

Trip 4 : Basel erahnen woodoo !

Närve-uffriibendi **Stadtrundfahrt per ÖV** (Öfters Verspätet)
im Fiehrerstand vom **Perplexity-Tram**.

Speziell: Do s`Cockpit em Drämmler d` Sicht versperrt,
muesch sälber luege, was sunscht no verkeert !

Eine Meldung der BVB Leid-Stelle:

< Het dr Chauffeur fascht kai Sicht
fahrt er halt mit Zueversicht ! >

Scandalomale:

Wär Millione verschänggt, und maint, es bliib ghaim, dä irrt !
Nimm als Byschpil **dr 3-er no St.Louis**,
dä fahrt demnäggscht guet gschmiirt !!

BVBene: Wessels Brot ich ess, dess Lied ich sing !

Trip 5 : No noise - no fun ! (isch änglisch)

Geischterstund uf em Münsterplatz.

Täglich vo 00-24 h, usser bi Glaubensnacht,
Wiehnachtsmärt, Ladärne-Ustellig und andersartigi events.

Uskunft iber Aaläss gänn gären d`Aawooner,
dr Münsterpfarrer oder dr Fährimaa.

In dr ibrige Zyt isch Grabes-Rueh obligatorisch !

Ussnahm: Kreativ-Lärm vom Baudepartemänt (sälte !)

Notabene: De perturbationis pacis nil nisi bene.

Trip 6 : „Down to the ruuhts“ (fascht änglisch)

Arsche-logische Rundgang dur alli Bohrlecher,
Grabige und Uffriss. Fiehriige dur Amts-Löcher.

(Falls unverhofft e Parkplatz ufftaucht: Rueh bewahre !)

Ziel: ARA mit Umdrungg (**Apero Riche Alternatif**)

Cantabene: Kumm` mer gehn go wandere,
vo ainere Bauschtell zur andere !

Trip 7 : Spettacolo a posto (isch truurig)

Gmainsame **Bsuech** vom tragikomische Truuurspiel

„**Der gelbe Riese und sein Service sans Publique**“

im Volkstheater **HAUPTPOSCHT**

(Gaschtreggissore vo Bärn und ebeso beschränkti Spielduur).

Audibene: Gsundi Menscheverstandsschutzpfropfe –
griegsch gratis.

Trip 8 : Velodrom (isch en Alb-Troom!)

Reservierti **Tribüne-Stehplätz** am **Wessel Rad-Omnium** .

Spektakuläri Sicht uf die tangentiali, radiali, perpetuali
und luschtvoll schikanös priorisierti Velo-Rundstreggi.

Speziell: Hesch Interässe am Renne mitz`make, kasch
bim **Wessel-Verleih** e Velo (Rücktritt empfohle),

bim **Kopfschutz-Dürr** Helm und Händsche (gwäsche) und
bim **Huusarzt Vaurien** grieni Waadesalbi miete oder kaufe.

(Sattelgrössli und Sattel-Gender rächtzyttig aamälde!)

Esperabene: D` Tandem-Frauequote kunnt erscht im Summer !

**Und basst dr s`Programm nit und hesch dra kai Gnuss:
nimmsch anstatt e Chaise halt doch dä scheen Bus !**

Vom Määntig znacht bis am Mittwoch demoorge kasch
uff em Minschterplatz und em Kasärnen-Areal d`Ladärne-
d`Waagen- und Requisyten-Uustellig go aaluege!

Kumm doch au in unsere Glygge-Käller
an dr Theaterstrooss 20

www.graenzgaenger.ch